

Dr. Laura Kozloski:

Aruba ta bay haya un lugar cu pashentnan ta sinti comfortable pa bishita



ORANJESTAD(AAN):

Dr. Laura Kozloski, vice presidente di proyectonan internacional pa Baptist Health International tabata na Aruba, como parti di un delegacion cu a bin wak e progreso den e proyecto di renovacion y expansion di ImSan.

Dialuna durante un conferencia di prensa el a bisa cu e ta contento di wak e bon progreso di e proyecto, cu lo brinda dos servicio importante pa Aruba.

"E proyecto aki ta nifica cu e pashentnan na Aruba cu tin mester di radiacion y oncologia, como tambe algun servicio agudo pa problema di wowo, lo no tin cu bandona Aruba mas y ta bay por haya e cuidu cu nan tin mester di dje, for di docternan cu nan por wak tur dia".

Esaki segun Dr. Kozloski, kende a splica cu Baptist International na Merca tin 11 hospital cu un total di casi 24.000 empleado cu ta ansioso pa yuda Aruba for di nan propio perspectiva pa asina duna algun tip y guia pa cosnan

cu ImSan lo por scoge pa uza.

"E sosten cu den e 12 añanan cu nos ta partner cu ImSan nos a haya for di comunidad di Aruba cu ta inclui entre otro AZV, Minister di Salubridad, diferente especialista y docter, ta hopi bon".

"Nan a duna bon informacion y esey ta esencial pasobra ta hopi importante pa haya informacion for di e pashentnan, como tambe for di e docternan".

"Asina Aruba lo haya un lugar cu pashent y posibel pashentnan ta sinti comfortable pa bishita y no un lugar cu bo ta preocupa pa bishita", segun Dr. Kozloski.

"Nos filosofia ta pa yuda comparti nos conocimiento y experiencia y nos erroman, pa asina esakinan no sosode otro caminda".

"Asina nos ta yuda mehora e cuidu di salud, for di e experiancianan cu nos tabata tin, segun Dr. Kozloski.

